


cq+.





Declaratiõ du Roy, de
LA CAVSE ET OCCA-
sion de la mort de l'Admiral, & au-
tres ses adherés & complices, der-
nieremēt aduenue en ceste ville de
Paris le xxiiii.iour du present moys
d'Aoust. M. D. LXXII.



A PARIS.

Par Iean Dallier libraire demeurant
sur le pont saint Michel, à l'enseigne
de la rose blanche.

M.. D. LXXII.

Par permission du Roy.

X

Case
F
39
326

1572f

THE NEWBERRY
LIBRARY

Depar le Roy.

SA MAIESTE
 desirant faire sça-
 uoir & cognoistre
 à tous Seigneurs,
 Gentilhommes, &
 autres ses suiets, la
 cause & occasion
 de la mort de l'Admiral, & autres ses
 adherans & complices, dernièrement
 aduenue en ceste ville de Paris le xxiiij.
 iour du present mois d'Aoust, d'autāt
 que ledit fait leur pourroit auoir esté
 deguisé autrement qu'il n'est.

SADICTE Maiesté declare que ce
 qui en est ainsi aduenu a esté par son
 expres commandement, & non pour
 cause aucune de religion ne contreue-

nir à ses Edits de pacification qu'il a
tousiours entendu, cōme encore veult
& entend obseruer, garder & entrete-
nir, ains pour obuier & preuenir l'exe-
cution d'une malheureuse & detesta-
ble conspiration faicte par ledict Ad-
miral, chef & autheur d'icelle, & ses-
dicts adherans & complices, en la per-
sonne dudit seigneur Roy, & contre
son Estat: la Roynes sa mere, Messieurs
ses freres, le Roy de Nauarre, princes
& seigneurs estans pres d'eulx.

P A R Q U O Y sadicte maiesté fait
sçauoir par ceste presente declaration
& ordonnāce, à tous Gentilshommes
& autres quelsconques de la religion
pretendue reformée. Qu'elle veult &
entend qu'en toute seureté & liberté
ils puissent viure & demourer avec
leurs femmes, enfans & familles en

leurs maisons souz la protection du-
dit seigneur Roy, tout ainsi qu'ils ont
par cy deuant fait, & pouuoient faire
suyuât le benefice desdits Edits de pa-
cification.

COMMANDANT & ordonnant
tresexpressement à tous Gouverneurs
& Lieutenans Generaux, En chascun
de ses pays & prouinces, & à tous au-
tres ses iusticiers & officiers qu'il ap-
partiendra, de n'attempter, permettre
ne souffrir estre attempté, ne entrepris
en quelque sorte & maniere que ce
soit, es personnes & biens desdits de
la religion, leursdictes femmes, enfans
& famille, Sur peine de la vie, contre
les delinquans & coupables.

ET neantmoins pour obuier aux
troubles, scādalles, soupçon & deffiā-

ce qui pourroient aduenir à cause des
presches & assemblées qui se pour-
roient faire, tant és maisons desdicts
Gentilshommes que aillieurs, selon &
ainsi qu'il est permis par les susdicts
Edicts de pacificatiō: Sadicte maiesté
fait trefexpresses inhibitiōs & deffen-
ses à tous lesdicts Gentilshommes &
autres estans de ladicte religion de
ne faire assemblées pour quelque oc-
casion que ce soit, iusques à ce que
par ledict seigneur apres auoir pour-
ueu à la tranquillité de son Royau-
me, en soit autrement ordonné. Et ce
sur peine de desobeissance & de con-
fiscation de corps & de biens.

EST aussi expressement deffendu sur
les mesmes peines à tous ceulx qui
pour raison de ce que dessus, auroient
ou retiendroient des prisonniers, de

ne prendre aucune rançon d'eulx, & d'aduertir incontinent les Gouverneurs des prouinces, ou Lieutenās généraux, du nom & qualité desdicts prisonniers, lesquels sadiète Maiesté ordonne les relascher & faire mettre en liberté : si ce n'est toutesfoys qu'ils soyent des chefs qui ont eu commandement pour ceulx de la Religion, ou qui ayent faict des pratiques & menées pour eulx: & lesquels pourroient auoir eu intelligence de la conspiration susdiète : Auquel cas ils en aduertiront incontinent sadiète Maiesté, pour sur ce leur faire entendre sa volonté.

Ordonnant aussi que d'oresnauant nul ne soit si hardy, de prendre & arrester prisonnier aucun pour raison de ce que dessus, sans l'expres cōman-

dement dudiect Sieur, ou de ses officiers. Et de n'aller courir ny prendre par les champs, fermes, & mestairies aucũs cheuaux, iumẽts bœufs, vaches & autre bestail, biens, fruits, grains, ny choses quelconques, & ne meffaire ne mesdire aux laboureurs, mais les laisser faire & exercer en paix & avecque toute seureté leur labourage & ce qui est de leur vacation. Et ce sur les peines susdictes.

Fait à Paris le xxviii. iour d'Aoust,
l'an M. D. LXXII.

Signé

CHARLES.

Et au dessoubz

FIZES.

